



Sud Bosne i Hercegovine
Суд Босне и Херцеговине

Broj: S1 3 Iž 038063 20 Iž
Sarajevo, 23.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Vesne Trifunović, kao predsjednika vijeća, Srete Crnjaka i Dinke Bešliagić-Čovrk, kao članova vijeća, odlučujući o žalbi Mile Tadića i Ive Tadić, oboje na adresi Saikogasse 7/8/14, 1220 Wien, Austrija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 23.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelje odbijen je upis iz razloga što su isti registrovani na više različitih adresa.

Žalitelji su protiv navedene odluke blagovremeno izjavili žalbu navodeći da su njihove prijave za glasanje izvan BiH odbijene. Tvrde da njihova porodica živi na adresi Saikogasse 7/8/14, 1220 Wien, Austrija, te mole da im se omogući glasanje putem pošte sa navedene adrese.

Centralna izborna komisija Bosne i Hercegovine u odgovoru na žalbu navodi da su za podnositelje žalbe dostavljene po dvije prijave u kojima su navedene

različite adrese na koje će biti upućen glasački materijal, te da žalitelji nisu dostavili potvrdu nadležnog organa o prebivalištu/boravištu izvan BiH, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da su za navedena lica dostavljene po dvije (2) prijave na obrascu PRP-1-Prijava za glasanje izvan BiH, te da su navedene različite adrese na koje će biti upućen glasački materijal. U konkretnom slučaju u prvoj prijavi navedena je ista adresa za oba žalitelja, a to je Dragutina Domjanića 10, 10370 Gornje Dvorišće – Dugo Selo, R Hrvatska, dok je u drugoj prijavi naznačena adresa u Austriji, Saikogasse 7/8/14, 1220 Wien, takođe ista za oba žalitelja.

I po shvatanju apelacionog vijeća, prva dostavljena prijava žalitelja Mile Tadića i Ive Tadić se ne može smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositelji žalbe podnošenjem druge prijave nisu ukazali da imaju saznanja o podnesenoj prvoj prijavi, kada bi se moglo cijeniti da druga podnesena prijava predstavlja promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositelji žalbe nisu Centralnoj izbornoj komisiji BiH dostavili, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjevaju da budu registrovani prava adresa njihovog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužan dokazati podnositelj prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žaliteljima nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti mogu glasati na redovnom biračkom mjestu u općini u kojoj imaju prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Vesna Trifunović